

K29-51^t

中國方志叢書·華北地方·第二二八號

據清·高廷法修陸耀通等纂
清·嘉慶二十四年修民國二十五年重印本

影印

陝西 省

咸寧縣志

(三)

成文出版社有限公司印行

中華民國五十八年 月壹一版

咸寧縣志

全三冊

發行人：**黃 成 助**

出版者：**成文出版社有限公司**

台北郵政信箱二二六〇五號
台北市羅斯福路三段279之二號
電話：三七〇一三二號

印刷者：**東南印製廠有限公司**
和平西路二段70巷83弄29號

內政部登記證內版台業字第一一四七號

咸寧縣志卷十八

列傳上

維終南負地絡之陰西起洮岷東帶嵩洛連岷嶺萃綿數千里龍首原承終南之陰蜿蜒蜒自樊川而北岡愈高脊愈廣爲西安會城隋唐故都在焉又北而東達渭水漢故都在焉土厚水深無珍異之產其靈淑清越之氣扶輿磅礴而鬱積者獨鍾於人名臣碩彥炳於史冊者若比肩旋踵之相接漢徒列侯丞相將軍二千石於諸陵若張安世杜延年趙充國蕭望之馮奉世韋元成勳名炳耀先後相望由魏晉迄隋唐韋杜至著有唐一代韋氏宰相二十六人杜氏宰相十一人其極盛矣宋金以後人文之盛稍減於古豈靈淑清越之氣亦與都會爲廢興乎今敍次史傳凡姓氏爵里遺行軼事悉爲編述逮於國朝其忠節孝友儒學文藝義行逸民方技則如史例分列

焉作列傳

漢

蘇建杜陵人以校尉從大將軍衛青擊匈奴封平陵侯以將軍築朔方後以衛尉爲遊擊將軍從大將軍出朔方後一歲以右將軍再從大將軍出定襄亡翕侯失軍當斬贖爲庶人其後爲代郡太守卒官

有三子嘉奉車都尉賢騎都尉中子武最知名

漢書本傳武別傳忠節

張安世字子孺杜陵人以父湯任爲郎給事尚書上幸河東亡書三篋詔問莫能知唯安世識之擢尚書令遷光祿大夫昭帝卽位大將軍霍光秉政以安世爲右將軍光祿勳以自副封富平侯昭帝崩光白太后徙安世爲車騎將軍欲共徵立昌邑王王淫亂光與安世謀廢王立宣帝宣帝卽位益封萬六百戶子千秋延壽彭祖皆中郎將侍中光薨拜大司馬車騎將軍領尚書事數月更爲衛將軍兩宮衛

尉城門北軍兵屬焉安世職典樞機以謹慎周密自著外內無間每定大政已決輒移病出聞有詔令乃驚使吏之丞相府問焉朝廷大臣莫知其與議也嘗有所薦其人來謝弗爲通有郎功高不調自言安世絕不許已而郎果遷其匿名迹遠權勢如此安世尊爲公侯食邑萬戶然身衣弋綈夫人自紡績家童皆有手技作事內治產業富於大將軍光元康四年薨諡曰敬侯賜塋杜東子延壽歷位九卿旣嗣侯國租入歲千餘萬延壽以身無功德數上書讓減戶邑又因弟陽都侯彭祖口陳迺徙封薨諡愛侯子勃嗣爲散騎諫大夫元帝詔列侯舉茂材勃舉大官獻丞陳湯湯有罪勃坐削二百戶後湯立功西域世以勃爲知人子臨嗣臨亦謙儉每登閣殿歎曰桑霍爲我戒豈不厚哉尙敬武公主薨子放嗣鴻嘉中上與近臣遊宴放以公主子開敏得幸取皇后弟平恩侯許嘉女上爲供張充以乘輿服飾號

為天子取婦皇后嫁女放為侍中中郎將與上臥起寵愛殊絕成帝

崩放思慕哭泣而死放子純別傳初安世長子千秋與霍光子禹俱為中

郎將將兵隨度遼將軍范明友擊烏桓還謁大將軍光問千秋戰鬪

方略山川形勢千秋口對兵車畫地成圖光復問禹禹不能記曰皆

有文書光嘆曰霍氏世衰張氏興矣及禹誅滅而安世子孫相繼為

侍中中常侍諸曹散騎列校尉者凡十餘人漢書本傳

張賀安世兄幸於衛太子太子敗賀下蠶室後為掖庭令宣帝以皇

曾孫收養掖庭賀內傷太子無辜曾孫孤幼所以視養拊循恩甚密

焉及曾孫壯大賀教書令受詩為取許妃以家財聘之及宣帝即位

賀已死上追思賀恩封其塚二百家諡曰哀漢書張安世傳

杜延年字幼公父周南陽杜衍人武帝時徙茂陵至延年徙杜陵明

法律昭帝初立大將軍霍光秉政以延年吏才有餘補軍司空始元

四年益州蠻夷反以校尉將南陽士擊益州還爲諫大夫上官桀謀爲亂延年以聞桀等伏辜封建平侯擢爲太僕右曹給事中光持刑罰嚴延年輔之以寬議論持平合和朝廷見國家承武帝奢侈師旅之後數爲光言年歲比不登流民不盡還宜修孝文時政示以儉約寬和順天心說民意年歲宜應光納其言舉賢良議罷酒榷鹽鐵昌邑王廢光與大臣議所立延年勸光立宣帝以定策功益戶二千三百延年爲人安和備於諸事久典朝政上任信之居九卿位十餘年賞賜賂遺訾數千萬光子禹誅延年坐免官後拜北地太守選用良吏捕擊豪強郡中清靜徙西河太守治甚有名五鳳中徵爲御史大夫視事三歲以老病乞骸骨賜安車駟馬罷就第數月薨諡敬侯子緩嗣緩少爲郎本始中以校尉從蒲類將軍擊匈奴還爲諫大夫遷上谷都尉鴈門太守延年薨徵視喪事拜爲太常治諸陵縣每冬月

封具獄日常去酒省食官屬稱其有恩元帝初卽位穀貴民流永光
中西羌反緩輒上書入錢穀助用前後數百萬緩六弟五人至大官
少弟熊歷五郡二千石三州牧刺史有能名唯中弟欽官不至而最
知名

按唐書宰相世系表延年六子緩繼他紹緒熊熊字少卿荊州刺

史漢書本傳緩六弟是延年子七人唐書世系表不及欽誤

杜欽字子夏延年子少好經書目偏盲茂陵杜鄴與欽同姓字俱以
才能稱京師故衣冠謂欽爲盲杜子夏以相別欽惡以疾見詆乃爲
小冠由是京師更謂欽爲小冠杜子夏帝舅大將軍王鳳請欽爲大
將軍武庫令欽爲人深博有謀自上爲太子時以好色聞及卽位皇
太后詔采良家女欽說大將軍鳳曰禮一娶九女所以極陽數廣嗣
重祖也將軍輔政宜建九女之制詳擇有行義之家求淑女之質毋

必有聲色音技能爲萬世大法鳳白之太后後有日蝕地震之變詔
舉直言欽上對曰陛下正后妾抑女寵防奢泰去佚遊躬節儉親萬
事親二宮之饗膳致晨昏之定省如此卽堯舜不足比隆咎異何足
消滅欽以病罷後徵詣大將軍幕府數稱達名士王駿韋安世王延
世等救解馮野王王尊胡常之罪過及繼功臣絕世鎮撫四夷當世
善政多出於欽者以壽終欽子及昆弟支屬至二千石者十人欽兄
緩前免太常以列侯奉朝請成帝時薨子業嗣

業有材能以列侯選爲太常數言得失不事權貴後坐法免官復爲
函谷關都尉哀帝卽位上書言王氏世權日久宜以義割恩徵復爲
太常會司隸奏業選舉不實坐免官復就國發病死業成帝初尙帝
妹潁邑公主無子薨家上書求還京師與主合葬不許賜諡曰荒

侯

並漢書
杜周傳

成

宰

系

一

卷

十一

列傳上

四

趙充國字翁孫本上邽人沈勇有大略少好將帥之節學兵法通知四夷事武帝時以假司馬從貳師擊匈奴潰圍陷陣身被二十餘創拜爲中郎將昭帝時武都氏人反充國以護軍都尉擊定之遷中郎將屯上谷還爲水衡都尉擊匈奴西祁王擢後將軍與大將軍霍光定策立宣帝封營平侯本始中爲蒲類將軍征匈奴斬虜數百級還爲後將軍少府徙杜陵匈奴大發十餘萬騎欲入寇充國將四萬騎屯緣邊九郡單于聞之引去元康三年先零與諸羌種豪解仇交質兩府白遣義渠安國行視諸羌安國召諸豪三十餘人斬之於是諸羌劫掠犯塞上使問誰可將者充國對曰無踰於老臣者矣上曰將軍度羌虜何如當用幾人充國曰百聞不如一見兵難踰度臣願馳至金城圖上方略遂西至西部都尉府日饗軍士士皆欲爲用充國子中郎將卬將兵至今居虜並出絕轉道卬以聞詔入校尉合疏捕

山間虜通轉道津渡充國欲以威信招降罕开解散虜謀徼極乃擊之時議者咸以爲先零負罕开之助不先破罕开則先零未可圖上以書勅讓充國充國以將在外便宜有守以安國家乃上書陳兵利害七月璽書報從充國計充國引兵至先零虜久解弛望見大軍棄車重欲渡湟水道阨狹充國徐行驅之攜馬牛羊十萬餘頭車四千餘輛兵至罕地令軍無燔聚落芻牧田中罕开聞之喜願得還復故地後竟不煩兵而下時羌降者萬餘人充國欲罷騎兵屯田以待其敝會得進兵璽書中郎將卬懼使客諫充國曰誠令兵出利與病何足事一旦不合上意遣繡衣來責將軍將軍不能自保何國家之安充國嘆曰是何言之不忠也吾固以死守之遂上屯田便宜十二事充國奏每上輒下公卿議初是充國計者什三中什五最後什八詔詰前言不便者皆頓首服上於是詔罷兵獨充國留屯田明年充國

奏罷屯田振旅而還賜安車駟馬罷就第朝廷每有四夷大議常與參兵謀問籌策焉年八十六薨諡曰壯侯傳子至孫欽欽亡子國除

元始中復封充國曾孫伋為營平侯

漢書本傳

韋元成字少翁丞相賢少子以父任為郎常侍騎少好學修父業謙遜下士名譽日廣以明經擢諫大夫遷大河都尉初元成兄宏為太常丞賢病篤宏坐宗廟事繫獄賢門下生與宗家矯賢令以元成為後元成知非賢雅意即陽病狂徵至長安不得已受爵宣帝高其節以為河南太守歷遷太常坐與楊惲厚善免官後以列侯侍祀孝惠廟有司刻奏削爵為關內侯作詩自刻責初帝寵淮陽憲王欲以為嗣久之欲感風憲王輔以禮讓之臣召拜元成為淮陽中尉詔與蕭望之及五經諸儒雜論同異於石渠閣條奏其對永光中代于定國為丞相封侯故國復作詩以戒子孫為相七年守正持重不及父賢

而文采過之建昭三年薨諡共侯初賢以昭帝時徙平陵元成別徙杜陵死歸葬父墓子頃侯寬嗣薨子僖侯育嗣薨子節侯沈嗣自賢

傳國至元孫迺絕

漢書韋賢傳

韓延壽字長公燕人徙杜陵少爲郡文學擢諫大夫遷淮陽太守徙潁川潁川多豪強難治趙廣漢爲太守患其俗多朋黨構會吏民令相告訐由是爲俗延壽欲更之教以禮讓乃召郡中長老數十人接以禮意問以謠俗爲陳和睦親愛銷除怨咎之路長老皆以爲便議定嫁娶喪祭儀品略依古禮不得過法於是令文學校官諸生皮弁執俎豆爲吏民行禮百姓遵用其教數年徙東郡太守延壽爲吏上禮義好古教化所至必聘其賢士用廣謀議納諫爭修治學宮春秋鄉射陳鐘鼓管絃盛升降揖讓及都試講武設斧鉞旌旗習射御之事又置正五長相率以孝弟不得舍奸人閭里阡陌有非常吏輒聞

知姦人莫敢入界其始若煩後皆便安之在東郡三歲令行禁止斷獄大減爲天下最入守左馮翊滿歲稱職爲眞歲餘行縣至高陵民有昆弟訟田延壽曰幸得備位爲郡表率不能宣明教化令民骨肉爭訟咎在馮翊當先退因閉閣思過令丞嗇夫三老亦皆自繫待罪兩昆弟悔謝郡中歛然勅厲二十四縣莫復以辭訟自言者延壽代蕭望之爲左馮翊侍謁者福爲望之道延壽在東郡時放散官錢千餘萬治飾兵車畫龍虎朱雀衣黃紃方領於是望之劾延壽僭上不道竟棄市百姓莫不流涕三子皆爲郎吏且死屬其子弗爲吏以己爲戒子皆去官不仕孫威復爲吏至將軍亦多恩信能拊衆得士死力坐奢僭誅

漢書本傳

尹翁歸字子况平陽人徙杜陵爲市吏公廉不受饋百賈畏之田延年爲河東太守除補卒史大重之自以不及翁歸舉廉爲緱氏尉所

居治理遷都內令舉廉爲宏農都尉徵拜東海太守明察東海大治以高第入爲右扶風疾姦選用廉平吏接待以禮好惡與同之其負翁歸罰亦必行扶風大治課爲三輔最翁歸爲政雖任刑其在公卿之間清潔自守語不及私溫良謙退不以行能驕人甚得名譽於朝廷元康四年病卒家無餘財天子賢之賜翁歸子黃金百斤以奉祭祀翁歸三子皆爲郡守少子岑歷位九卿至後將軍

漢書本傳

張敞字子高平陽人祖父孺徙茂陵父福官光祿大夫敞後徙杜陵本以鄉有秩補太守卒史稍遷太僕丞上書諫昌邑王以切諫顯名擢豫州刺史數上事有忠言宣帝徵爲大中大夫以忤大將軍光復出爲函谷關都尉徙山陽太守復上封事言霍氏久之渤海膠東盜賊並起徵拜膠東相敞到膠東明設購賞開羣盜令相捕斬除罪由是盜賊解散王太后好畋獵敞上書諫止詔以敞守京兆尹自趙廣

漢誅後守尹皆不稱職長安市偷盜尤多敞求問長安父老偷盜酋長數人居皆溫厚出從童騎閭里以爲長者敞皆召見責問令致諸偷以自贖偷長受署敞皆以吏遣歸休置酒小偷悉來賀飲醉偷長以赭汙其衣裾吏坐里閭閱出者汙赭輒收縛之窮治所犯盡行法罰敞爲人敏疾見惡輒取然本治春秋以經術自輔其政頗雜儒雅不純用誅罰朝廷每有大議引古今處便宜公卿皆服天子數從之爲京兆九歲坐與光祿勳楊惲善免爲庶人旣數月冀州有大賊天子召拜冀州刺史敞到部歲餘賊盜禁止元帝徵敞欲以爲左馮翊會病卒初敞爲京兆尹弟武拜爲梁相時梁王驕貴民多豪強號難治敞戒吏問武武意欲以刑法治梁吏還道之敞笑曰武必辯治梁矣旣到官其治有迹敞三子官皆至都尉孫竦王莽時至郡守封侯博學文雅過於敞然政事不及也

漢書本傳

竦爲京兆史博學通達以廉

儉自守

漢書游俠陳遵傳

敞善古文傳子吉吉子靖字伯松博學文雅過於

敞

書斷按靖當作疎陳遵傳張竦伯松

蕭望之字長倩東海蘭陵人徙杜陵家世以田爲業望之好學治齊詩事同縣后倉且十年以令詣太常受業復事同學博士白奇又從夏侯勝問論語禮服京師諸儒稱述焉以射策甲科爲郎署小苑東門侯御史大夫魏相除爲屬察廉爲大行治禮丞地節三年夏京師雨雹望之上疏請陳災異下少府問狀對奏拜爲謁者累遷諫大夫丞相司直歲中三遷爲平原太守徵入守少府宣帝察望之經明持重論議有餘材任宰相欲詳試其政事復以爲左馮翊是歲西羌反京兆尹張敞上書言國兵在外無餘積願令諸有罪非不得赦者皆得入穀贖罪事下有司議望之以爲如此則富者得生貧者得死是貧富異刑罰不一也遂不施敞議望之爲左馮翊三年京師稱之遷